

Wednesday, December 31, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

NEW YEAR SECURITY

Aizawl khawpui-in muanawm taka kum hlui thlaha kum thar a hmuah theih na'n uluk taka venhimna kalpui turin ruahmanna siam a ni.

Aizawl district SP Pu Zosangliana'n Akashvani Aizawl news a hrilh danin ke a kal leh lirthei hmanga venhimna hna thawk turin Police rual ruahman a ni a. Hei bakah hian rikrum thila inring turin Flying Squad leh Quick response team siam an ni baw k a. Aizawl leh a chhehvel hnai hi Zone li a thenin, Zone tin hi office Dy.SP pahnih zelin an vil ang a, Zone li hi sector 18-ah then a ni baw k. He'ng duty-te supervise leh monitor turin SDPO 2, Addl SP 2 bakah district SP te an duty-na hmunah kal kualin an vil baw k ang. SP chuan Police duty-te hi chhun-zan zawmin an awm reng dawn tih a sawi a. Venhimna lam an ruahman hi January ni 2 thleng kalpui tura tih phawt a nih thu a sawi. Nikum lama sorkar thupek bawhchhia a halpuah leh halmawi haltute halna hmun hre tura drone an hman ang kha kuminah hi chuan tih a ni dawn lo a ni, a ti.

Nimin khan Aizawl district Crime Branch Addl. SP Pu Zoramthara hovin Police leh central YMA te chuan Aizawl Dawrpui veng velah halpuah leh halmawi an dap a. Man an nei lo niin a sawi. Nikum lama an dap tawh thin avangin zuar an awm a nih pawhin an thukru tha hle ni a an ngaih thu Police hotute chuan an sawi a ni.

Lunglei-ah pawh nimin khan district SP Pu J. Lalmuankima hovin Krismas hman zawh taka Lunglei Police-te duty dan an thlirlet a. Thukhawmte hian kum hlui thlah zanah mipuite halpuah leh halmawi bakah, puak thei chi reng reng hal lo turin an ngen a. He hunah hian halpuah leh halmawi chungchanga District Magistrate-in khapna thupek a chhuah tawh anga khauh taka hma lak dan tur sawi ho a ni baw k a. Kum thar lo thleng tur hmuahnaah police leh traffic lam chu inthlahdah lova duty ngawrh taka chhunzawm tur leh veng kilkhawr lamte pawh tlawh kual vek tura hriattir an ni.



HM MESSAGE

Home Minister Pu K. Sapdanga kum 2026 kumthar lawm tur inbuatsaihna kal mekah nikum lamah khan, dan tlawhchhanin, halpuah leh halmawi hal lo turin inngen a nih thu sawiin mi tam zawkin an zawm tha hle a ni tiin lawmthu a sawi a. Halpuah leh Halmawi hal hi a nuamin, a hlimawm hle mai a, han inkhap leh, ti lo tura han inngen te pawh a hrehawm a tih thu a sawi a. Chuti chung chuan damlo leh mi chaklo zawkte hian, halpuah ri leh halmawi khute hi an manganphah em mai a, hei vang chauh pawh hian, insum hram turin mi tinte a ngen leh a ni.

Mizote chu tanpui ngaite tanpui thin, khawngaihthlakte khawngaih thin, thlaphangte thlamuan thin, lusunte pawh tlaivara tawrhpu thin hnam nihna-ah kha Zo nun ze mawi kha lan chhuahtir thar leh ila a duh thu a sawi a. Halpuah leh Halmawi hmangin tumah thlabarin siam lo turin a ngen a. Nu leh Pate, Thalaite leh naupangte zah tak chungin, he ngenna hi a siam tih a sawi a. Kum 2026 kumthar atan mi tinte chibai a buk a, duhsakna sang ber a hlan thu a sawi bawk a ni.



CM ON ANJEL CHAKMA

Chief Minister Pu Lalduhoma chuan Dehradun a thi ta Tripura zirlai Anjel Chakma thihna-in a khawih nat thu a sawi a. Lusun chhungte a tawrhpu thu sawiin he thil thleng rapthlak tak hian India ram hmun danga hmarchhak mi awmte'n harsatna an tawhte a tarlang zui zel a ni a ti a. Hnam thila inthliar hranna leh pawngpaw inhuatna hian India Constitution hnuai-ah hmun a nei lova, mihring dikna leh chanvo humhalh turin dan rorelna kenkawh a pawimawh a ni, a ti.

Pu C. Ngunlianchunga MLA pawhin Dehradun a misualte'n an thah tak MBA zirlai Anjel Chakma thihna chu pawh a tih thu leh runthlak a tih thu a sawi a. Zirlai leh hnam tlem zawkte chung a hleilenna thleng thin chu hnam changkang zinga thilthleng chi a ni lo a ti. Hetianga pawikhawihna rapthlak tak thlengah hian thuneitute chu tan lam nei lova a mawhphurtute chhui chhuak ngei turin a phut bawk a ni.



NO VEHICLE ZONE

Vawiin hi Kumina ni tawp ber niin mipui tam tak kumhlui thlah tur leh kumthar lawm tur an inbuatsaihna-ah Aizawl bazarah pawh sorkar ruahmanna-in Chanmari leh Zodin Square inkarah lirthei kal phal lohna No Vehicle Zone kalpui leh a ni.

Vawiin hian a ni thumna atan No Vehicle Zone hi kalpui-in Aizawl New Market High Mast tualah mitthi an awm avangin vawiin khan hemi chhehvela thawmhaw dawr leh dawr chi hrang hrang hmun engemawzat chu an inkhar a, chuti chung chuan mipui bazar tura veivak an thahnem hle a ni. Aizawl hmun bazar lun laiah chakkhai lam an tam hle a. Chhungkua leh thianhoa intihlim an tam avangin khawpui a lun hle a. Mi tam tak ke-in bazarah an kal a, Krismas hmaa No Vehicle Zone nena khaikhinin mipui hi an tlem phah chuang lo tih Akashvani Corr in a sawi.

No Vehicle Zone hian Emergency duty bakah, natna avanga Damdawiin pante a huam lo a. Coordination Committee on Traffic Management te chuan lirthei a chuang te chhukna tur bakah lirthei chi hrang hrang hunna tur ruahmanna an siam bawk a ni.

